

आकाशवाणी

- संसद दे दौनें सदनें राष्ट्रपति दे अभिभाषण पर धन्नवाद प्रस्ताव पर चर्चा शुरू कीती, विपक्षी सदस्ये आसेआ बक्ख-बक्ख मुद्दे पर हंगामे दे बाद लोकसभा गी दिन भरे लेई स्थगित करी दिता गेआ।
- राष्ट्रपति द्रौपदी मुर्मू होंरे अज्ज थमां मणिपुर च राष्ट्रपति शासन रद्द करी दिता।
- सुप्रीम कोर्ट नै नीट पी.जी 2025-26 दे क्वालीफाइंग कट ऑफ च कमी गी चुनौती देने आहली याचिका पर जवाब मंगेआ ऐ।
- सुरक्षाबले जम्मू-कश्मीर दे उधमपुर जिले च छप्पे दे 2 आतंकवादिएं गी मारी मकाया।
- भारत, ब्रिक्स देशे च विनिर्माण कंपनिएं ते लघु ते मध्यम उद्यमे गी एकीकृत सहायता सेवा प्रदान करने लेई ब्रिक्स औद्योगिक दक्षता केंद्र च शामिल होआ ऐ।
- एशियाई राइफल ते पिस्टल शूटिंग चैंपियनशिप 2026 उद्घाटन दिवस पर महिलाएं दी व्यक्तिगत 10 मीटर एयर पिस्टल मकाबले दे फाइनल च ओलंपियन ईशा सिंह होंरे सुन्ने दा तगमा जित्तेआ।

<><><><><><>

LS-Motion of Thanks

लोकसभा च अज्ज राष्ट्रपति हुंदे अभिभाषण पर धन्नवाद प्रस्ताव पर चर्चा फही शुरू होई। दुई बारी सदन दे स्थगित होने दे बाद दपैहरी 2 बजे जिसलै सदन दी कार्रवाई फही शुरू होई ते चर्चा च शामिल होदे होई टी.डी.पी दे जी.एम बालायोगी होंरे धन्नवाद प्रस्ताव दा समर्थन करदे होई आखेआ जे राष्ट्रपति हुंदा अभिभाषण सुधारें, समावेशन ते दीर्घकालिक मकाबलेबाजी पर आधारित इक आत्मविश्वासपूर्ण राष्ट्री रोड मैप प्रस्तुत करदा ऐ। उनें आखेआ जे राष्ट्रपति हुंदे अभिभाषण च इलेक्ट्रानिक्स विनिर्माण क्षेत्र च 25 बक्ख नौकरिये दे सृजन ते आई.टी सेवाएं ते वैश्विक क्षमता केंद्रे च इक करोड़ शा मते भारतीयें गी रोजगार देने पर लौस पाई।

चर्चा च शामिल हुंदे होई बीजेपी दे निशिकांत दुबे होरें धन्नवाद प्रस्ताव दा समर्थन कीता ते कांग्रेस शासनकाल दरान होए दे भ्रष्टाचार दा मुद्दा चुक्केआ। जिसलै उनें साबका प्रधानमंत्रिये जवाहरलाल नेहरू ते इंदिरा गांधी हुंदी सरबंधित पुस्तके दा जिक्र कीता ते पीठासीन अधिकारी नै दुबे होरें गी छड़ा धन्नवाद प्रस्ताव पर बोलने लेई आखेआ कीजे लोकसभा अध्यक्ष ओम बिरला होर इस मामले च अपना फैसला देई चुके दे हे। विपक्ष दे हंगामे बश्कार अध्यक्ष होरें सदन गी शामी 5 बजे तगर लेई स्थगित करी दिता।

<><><><><><>

R S Motion of Thanks

राज्यसभा च अज्ज राष्ट्रपति हुंदे अभिभाषण पर धन्नवाद प्रस्ताव पर चर्चा फही शुरू होई। चर्चा च शामिल हुंदे होई केंद्री मंत्री ते सदन दे नेता जे.पी नड्डा होरें आखेआ जे राष्ट्रपति हुंदा भाषण भारत दी विकास गाथा गी दर्शादा ऐ ते बड़ा गै प्रेरणादायक ऐ। उनें आखेआ जे उंदा भाषण अमृतकाल दी भावना गी दर्शादा ऐ ते नरेंद्र मोदी सरकार दी उपलब्धिं गी बी उजागर करदा ऐ। श्री नड्डा होरें आखेआ जे 5 सभनें शा कमजोर अर्थ बवस्थां चा इक होने थमां लेइयै अज्ज भारत विश्व दी सभनें शा तेजी थमां बदने आहली प्रमुख अर्थबवस्था बनी गेआ ऐ। उनें आखेआ जे सरकार सुधार, प्रदर्शन ते परिवर्तन दी दृष्टि कन्नै कम्म करा'रदी ऐ। उनें आखेआ जे नरेंद्र मोदी सरकार दे नेतृत्व च देश दी सुरक्षा बवस्था गी मजबूत कीता गेआ ऐ ते भारत नै आप्रेशन सिंदूर तैहत पाकिस्तान गी मुंहतोड़ी जवाब दिंदे होई आतंकवादिं दे ठकाने गी तबाह करी दिता ऐ। राज्यसभा च विपक्ष दे नेता मल्लिकार्जुन खड़गे होरें चर्चा च शामिल हुंदे होई आरोप लाया जे मोदी सरकार दे शासन च सामाजिक न्या ते सद्भाव दी स्थिति बिगड़ी गई ऐ। उनें आरोप लाया जे देश च अनुसूचित जाति, अनुसूचित जनजाति ते महिलाएं खलाफ अपराध लगातार बदा'रदे न।

<><><><><><>

LS-Motion of Thanks

विपक्षी दलें आसेआ सदन च बक्ख-बक्ख मुद्दें पर हंगामे दे बाद लोकसभा गी अज्ज लेई स्थगित करी दिता गेआ। तीसरी बार स्थगन दे बाद जिसले सदन शामी 5 बजे फही शुरू होआ तां कांग्रेस, टीएमसी ते होरनें विपक्षी दलें दे सदस्यें सरकार खलाफ नारे लांदे होई सदन दे वेल च आई गे। हंगामे बश्कार अध्यक्ष होरें सदन गी अज्ज लेई स्थगित करी दिता ते कल बड्डलै 11 बजे फही बैठक करने दा आदेश दिता।

<><><><><><>

Manipur Prez. Rule

राष्ट्रपति द्रौपदी मुर्मू होरें अज्ज थमां मणिपुर च राष्ट्रपति शासन समाप्त करी दिता ऐ। राज्य च राष्ट्रपति शासन पिछले बरे 13 फरवरी गी लागू कीता गेआ हा। गृह मंत्रालय आसेआ इत सरबंधै च इक राजपत्र अधिसूचना जारी कीती गई। अधिसूचना च आखेआ गेआ जे राष्ट्रपति मुर्मू होरें पिछले बरे राज्ये थमां सरबंधत संविधान दे अनुच्छेद 356 तैहत जारी कीती गई राष्ट्रपति शासन दी घोशणा गी समाप्त करी दिता ऐ।

<><><><><><>

SC NEET PG Cutoff

सुप्रीम कोर्ट नै नीट पी.जी 2025-26 लेई क्वालीफाई कट ऑफ पर्सेंटाइल गी काफी घट्ट करने दे राष्ट्री आयुर्विज्ञान परीक्षा बोर्ड दे फैसले दे खलाफ दायर याचिका पर केंद्र सरकार ते होरनें प्राधिकरणें थमां जवाब मंगेआ ऐ। न्यामूर्ति पी.एस नरसिम्हा ते न्यामूर्ति आलोक अराधे हुंदी पीठ नै केंद्र सरकार राष्ट्री आयुर्विज्ञान परीक्षा बोर्ड, राष्ट्री चिकित्सा आयोग ते होरनें सरबंधित संस्थानें गी नोटिस जारी कीता ऐ। मामले दी अगली सुनवाई शुक्रवार गी होग। राष्ट्री आयुर्विज्ञान परीक्षा बोर्ड नै देश भरै च 18 जहार थमां मते स्नातकोत्तर चिकित्सा सीटें गी खाली दिखदे होई नीट पीजी कट ऑफ च संशोधन कीता ऐ।

संशोधन दे मताबक आरक्षित वर्ग लेई क्वालीफाइंग परसंटाइल 40 थमां घटिये सिफर करी दिता गेआ ऐ। इस कन्ने 800 चा सिफर थमां खल्ल 40 अंक हासिल करने आहले प्रतिभागी काउंसलिंग दे त्रीये दौर च शामिल होई सकदे न। सामान्य वर्ग लेई बी कट ऑफ 50 थमां घटाइये 7 परसंटाइल करी दिता गेआ ऐ।

<><><><><><>

Terrorist Killed

सुरक्षाबलें उधमपुर जिले च कुदरती गुफाएं च छप्पे दे जैश-ए-मोहम्मद दे दो आतंकवादिएं दा सफाया करी दिता ऐ। इक टकोहदी सूह पर कार्रवाई करदे होई सेना, जम्मू-कश्मीर पुलस ते C.R.P.F नै बसंतगढ़ दे जंगली इलाके च छप्पे दे आतंकवादिएं दा पता लाया। टाकरा कल दपैही मगरा शुरू होआ हा ते रूकी-रूकिये गोलीबारी दा सिलसिला जारी रेआ। मगरा बादू बलें गी बी सददेआ गेआ जेदे च पैहरा डूपर्स, खोजी कुत्ते, ड्रोन ते इलाके दी घेराबंदी बी शामिल ही। अज्ज आप्रेशन दे खीरें च दो आतंकवादिएं दा सफाया कीता गेआ। व्हाइट नाइट कोर नै सोशल मीडिया दी इक पोस्ट च जानकारी दिती जे एह अभियान सफलतापूर्वक सम्पन्न होई गेआ ऐ। इलाके च अजें बी सतर्कता बरती जा'रदी ऐ।

<><><><><><>

PM-Pariksha Pe Charcha

प्रधानमंत्री नरेन्द्र मोदी होरें लोकें गी शुक्करवारें “परीक्षा-पे-चर्चा” कार्यक्रम गी दिक्खने दी गुजारश कीती ऐ। इक सोशल मीडिया पोस्ट च प्रधानमंत्री होरें आखेया जे युवाएं कन्ने गल्लबात करना- ऊर्जा कन्ने भरोचे दा रेहा ऐ। उनें म्तेहान देन आलें विद्यार्थियें गी तनाs रहत होइयें म्तेहान देने- चुनौतियें कन्ने निब्बडने दे बवहारिक तरीके अपनाने- तालमेल स्थापत करने ते आत्मविश्वास बधाने पर जोर दिता।

श्री मोदी होंरे दस्सेया जे इस बरे म्तेहान देने आलें विद्यार्थियें कन्नै देवमोगरा- कोयंबटूर- रायपुर- गुवाहाटी ते उन्दे अधिकारिक आवास 7 लोक कल्याण मार्ग दिल्ली च महत्वपूर्ण सत्र आयोजित कीते जागंन।

<><><><><><>

Aadhar

भारतीय विशिष्ट पन्छान प्राधिकरण नै आधार डेटाबेस दी सटीकता ते अखंडता बनाई रखने आस्तै 25 लकख सोयां मते मृत व्यक्तियें दे आधार नंबर निष्क्रिय करी दिते न। इलेक्ट्रॉनिकी ते सूचना प्रौद्योगिकी राज्य मंत्री जितिन प्रसाद होंरे अज्ज लोकसभा च इक सोआले दे लिखित परते च एह जानकारी दिती। उने दस्सेआ जे आधार विश्व दी सबने थवा बड्डी बायोमेट्रिक पन्छान प्रणाली ऐ। इसदे च करीब 134 करोड़ सक्रिय आधार धारक न। श्री प्रसाद होंरे आखेआ जे कुसै व्यक्ति दी मौत होने पर, आधार नंबर दे अनधिकृत उपयोग गी रोकने आस्तै ओहदा आधार नंबर निष्क्रिय करना जरूरी ऐ। उने गलाया जे पंछान धोखाधड़ी दे जोखिम गी घट्ट करने ते देश च डेटा लीक गी रोकने आस्तै कई उपास कीते गए न। उने आखेआ जे प्राधिकरण नै इक नमां आधार ऐप लॉन्च कीता ऐ जेड़ा आधार नंबर धारकें गी ऑफ़लाइन सत्यापन दी इच्छा रखने आहली संस्थाएं कन्नै सत्यापित दस्तावेज सुरक्षित ते सुगम तरीके कन्नै सांझा करने दी सुविधा प्रदान करदा ऐ।

<><><><><><>

LA-Uproar

जम्मू-कश्मीर विधानसभा च अज्ज परतिए उपराज्यपाल मनोज सिन्हा हुं'दे संबोधन च धन्नवाद प्रस्तास पर चर्चा शुरू होई। एह चर्चा विपक्षी नेता सुनील शर्मा हुं'दे पीर पंजाल बारें टिप्पणी दे मगरा डंड-रौली पौने दे कारण थोड़े समें दे स्थगन मगरा दोबारा शुरू होई।

स्पीकर अब्दुल रहीम राथर होरें सभा गी 15 मिंटे आस्तै स्थगित करी दिता जिसलै सताधारी गठबंधन थमां किश सदस्यें विपक्षी नेता उंदी कथित टिप्पणी जेदे च आखेआ गेआ ऐ जे पीर पंजाल उन्दा ऐ गै नेई, कोला माफी दी मंग कीती। प्रश्नकाल दे खत्म होंदे गै कांग्रेस नेता इफ्तिखर अहमद होरें शर्मा हुं'दे बयान बारै सवाल पुच्छने आस्तै जियां गै अपनी सीट थमां खड़ोते, उआं गै शोर-शराबा शुरू होई गेआ।

<><><><><><>

CM-Bills

तोआई, मुखमंत्रि उमर अब्दुल्ला होरें विधानसभा च दो महत्वपूर्ण विधेयक पेश कीते। पहले विधेयक च किश कन्नूने गी संशोधित करने आस्तै आखेआ गेआ हा तां जे जीन जीने ते बपार करने च असानी आस्तै अपराधें गी अपराधें दी श्रेणी थमां हटाइए तर्कसंगत बनाया जा। दुए विधेयक च कुष्ट रोग कन्नूने पीड़ित लोकें खिलाफ भेदभाव गी खत्म करने ते ईलाज दे बराबरी दे मौके पक्के करने दी गल्ल कीती गेई ऐ।

<><><><><><>

India BRICS

भारत ब्रिक्स देशें च विनिर्माण कंपनिं ते सूक्ष्म, लघु ते मध्यम उद्यमें गी एकीकृत सहायता सेवा प्रदान करने लेई ब्रिक्स औद्योगिक दक्षता केंद्र च शामिल होई गेई ऐ। एहदी घोशणा नमीं दिल्ली च उद्योग ते आंतरिक बपार संवर्धन विभाग आसेआ आयोजित इक कार्जक्रम च कीती गेई। वाणिज्य ते उद्योग मंत्रालय नै आखेआ ऐ जे राष्ट्री उत्पादकता परिशद गी ब्रिक्स औद्योगिक दक्षता केंद्र दे रूपे च नीमित कीता गेआ ऐ। मंत्रालय नै आखेआ जे (NPC) (BCIC) कन्नूने देश दी सहभागिता दा नेतृत्व करोग ते क्षमता निर्माण, उत्पादकता वृद्धि ते उन्नत विनिर्माण पद्धतियें गी अपनाने च योगदान देग।

संयुक्त राष्ट्र औद्योगिक विकास संगठन कन्नै सांझेदारी च शुरू कीते गेदे ब्रिक्स दा उद्देश्य ब्रिक्स अर्थ बवस्था ते औदे कोला परे औद्योगिक नवाचार, आधुनिकीकरण ते अंतरराष्ट्री सहयोग गी बढ़ावा देना ऐ।

<><><><><><>

Buddha Relics Colombo

भगवान बुद्ध हुंदे पवित्र देवनीमोरी अवशेष अज्ज भारती वायु सेना दे विशेष सी.120जे विमान थमां कोलम्बो पुज्जे। गुजरात दे राज्यपाल आचार्य देवव्रत ते उपमुख्यमंत्री हर्ष सांधवी हुंदे नेतृत्व च इक उच्च स्तरीय भारती प्रतिनिधिमंडल बी इनें पवित्र अवशेषे कन्नै कोलंबो गेदे न। इनें पवित्र अवशेषे दा एह पैहला अंतरराष्ट्री प्रदर्शन ऐ ते इनेंगी 10 फरवरी तोड़ी गंगा रामया मंदिर च स्थापित कीता जाहग जित्थे ज्हारे श्रद्धालु इन्दे दर्शन करंगन।

<><><><><><>

Security-Beefed up

केंद्री गृह मंत्री अमित शाह होर जम्मू-कश्मीर दे दौरै पर आवा'रदे न। उन्दे दौरै दे मद्देनजर बाद्द सुरक्षाबले दी तैनाती कीती गई ऐ ते संवेदनशील इलाके च निगरानी बढ़ाई दिती गई ऐ। अधिकारिएं दा आखना ऐ जे खिते च कन्नू बवस्था बनाई रखने लेई सारे लोड़चदे इंतजाम कीते गेदे न। इस दरान ओह सुरक्षा स्थिति दा जायजा लैडन। सियासी नेताएं कन्नै बैठक करडन ते केई सारी विकास परियोजनाएं दी शुरूआत करडन।

<><><><><><>

Shooting

एशियाई राइफल ते पिस्टल चैंपियनशिप दे पैहले ध्याड़े दिल्ली दे डॉ. करणी सिंह शूटिंग रेंज च आयोजित महिला 10 मीटर एयर पिस्टल मकाबले दे फाइनल च ओलंपियन इशा सिंह होरें सुन्ने दा तगमा जित्तेआ।

21 बरे दी इशा होरें फाइनल च पिछड़ने दे बाद वापसी करदे होई 239 अशारिया 8 अंक हासल कीते ते अपना दुआ सीनियर एशियाई चैंपियनशिप सुन्ने दा तगमा अपने नां कीता। इशा ओलंपिक तगमा जेत् मनु भाकर ते सुरुचि सिंह हुंदी तिकड़ी नै 17.26 दे संयुक्त स्कोर कन्नै महिला टीम नै 10 मीटर एयर पिस्टल स्पर्धा च सुन्ने दा तगमा जित्तेआ।

<><><><><><>